

տուեալ շահն համարեսցի փոխան մայր դրամոց, իսկ եթէ առաւել իցէ տուեալ շահն քան զմայր գումարն՝ յետս դարձցի տուեալ շահն: Վասն այսպիսեաց առեալ էին վճիռ 'ի Դենպետէն, և իւրամ 'ի Դատաւորէն, և ըստ մտաց նոցին խնդրէին հանել հրովարտակ արքունուստ:

Փոխանորդ Աթուոյն Երուսաղէմի Զաքարիա վարդապետ ջանիւք և աշխատութեամբ Բիշմիշեան Մեծապատիւ եւ հոգեսէր Միքայէլ Ամիրայի նորոգեաց զհրովարտակն վասն պատարագելոյ Հայոց 'ի վերայ Գերեզմանին Քրիստոսի: զայս հրովարտակ առեալ էր Եղիազար Կաթողիկոս 'ի Ժամանակս իշխանութեան իւրոյ յԵրուսաղէմ՝ զորմէ գրեալ եմք յառաջագոյն: Եւ առաքեաց փութանակի զօրինակս նորին յեղիպտոս առ Կիրակոս Եպիսկոպոս Հասուցանել յԵրուսաղէմ 'ի ցնծութիւն Պօղոսի և միաբանաց, գրեալ թուղթ աղաչանաց և աւետեաց: զի մի 'ի հակառակելոյ օտար աղքաց և 'ի ծանրութենէ պարտուց վիրաւորեսցի, և մի երբէք արտմիլ թէ չէր ժամանակ այսպիսի իրաց: ահա օր ընդունելի և ժամանակ փրկութեան, զի Աստուած է որ յաջողէ զամենայն յամենայնի, որում կըրկնեսցի ծունր գոհութեան և երկրպագութեան, որ արժանի արար զազգն այսպիսի երկնապարգեւ շնորհաց, մի երկընչիլ տարապարտ ահարկութեան և խոխտանաց հակառակորդաց, զի 'ի զուր եւ ոչ ինչ են շնորհիւ մեծազօր Արքային և հաւատարիմ նախարարաց նորին, և ոչ կարեն կալ հակառակ մեզ: զի ժամ իսկ է քաջութեամբ պատահելոյ՝ խոհմութեամբ և լուրթեամբ զգործն կատարելոյ:

Գրեաց և Կիրակոս Եպիսկոպոս յեղիպտոսէ ընդ հրովարտակին բանս ուրախութեան և աւետեաց, որոյ սիրտն անպատում ուրախութեամբ զուարճացեալ և բերկրեալ էր, և աղաչէր զՊօղոս չեւանել յԱթուոյն՝ առաջի եղեալ նորա զանրաւ ֆնասն և զանդարմանելի վտանգն և կորուսանելոյ զհամբաւ իւր: Իսկ Զաքարիա վարդապետ առեալ էր զայլ եւս երկուս հրովարտակս սակս այլոց կարեւոր իրաց, եւ զյանձնարարական գրեանս վասն ներկայ խնդրոյն 'ի Գայմաղամ Փաշայէ առ Կուսակալն Դամասկոսի, առ Դատաւորն և Քաղաքապետն Երուսաղէմի: նոյնպէս և 'ի մեծէ Դենպետէն և 'ի Սեղանաւորէ նորին, և 'ի Քեահեայ Պէյէն